

Frá ritstjóra

Það var með nokkurri eftirvæntingu að Tímariti félagsráðgjafa var hleypt af stokkunum fyrir um rúmum tveimur árum með nýjum seglum, breyttu siglutré og kompási sem beindist að nýjum miðum. Ritstjórnin myndaði fjótt nokkuð samstillta áhöfn sem stefndi að því að skapa félagsráðgjöfum á Íslandi eigin fræðilegan vettvang. Hann skyldi þjóna að minnsta kosti tvíþættum tilgangi. Annars vegar var hugmyndin sú að með tímaritinu gætu félagsráðgjafar mótað sína eigin „menningarmiðstöð“ til að efla samkennd og styrkja innviði stéttarinnar. Hins vegar yrði tímaritið vettvangur til að kynna rannsóknir, birta niðurstöður þeirra og fjalla um margvíslegan afrakstur sérhæfðra starfa. Er þar m.a. átt við skýrslur um fagleg málefni, nefndarálit og greinargerðir er varða félagslegar úrbætur og stefnumótun og hafa verið færðar í fagfræðilegan búning. Með því myndi fræðileg staða greinarinnar styrkjast, í eigin þágu og annarra. Þá er ónefndur sá þáttur sem snertir þjóðfélagsumræðu, þ.e. að Tímarit félagsráðgjafa spegli hræringar liðandi stundar, það sem er efst á baugi í faginu og varðar hagsmuni almennings og skjólstæðingahóp félagsráðgjafa.

Fyrsta heftið var afhent félagsmönnum á hátíðarsamkomu í Félagsráðgjafarfélagi Íslands í júní 2010, og féllu þá nokkur orð meðal viðstaddra um álitlegan skapnað og ásýnd hins nýfædda barns. Viðbrögð aðspurðra þegar frá leið voru almennt jákvæð – en ekki mikil eða sterk. Freistandi er að grípa til málsháttarins Þögn er sama og samþykki! En til þess að velkjast ekki í vafa er nú ráðgert að senda í kjölfar þessa heftis út könnun til félagsmanna um álit þeirra, sýn og tillögur varðandi tímaritið.

Í undanfara 2010-heftisins hlutaðist ritstjórn TF um að haldið var námskeið um ritun fræðigreina. Það var ekki takmarkað við undirbúning birtingar á íslenskum vettvangi heldur jafnframt í erlendum, sérhæfðum og viðurkenndum tímaritum, sem jafnan eru ritrýnd. Tímarit félagsráðgjafa er að hluta ritrýnt og vill geta mætt óskum greinahöfunda um slíka efnismeðferð, bæði þeirra vegna og ekki síður til að auka fræðileg gæði tímaritsins. En æfðir ritrýnar eru ekki á hverju strái svo að í undanfara þessa heftis var efnt til annars námskeiðs – um ritrýni. Undirrituð sá um undirbúning og kennslu ásamt Halldóri S. Guðmundssyni. Nokkrir af þeim sem sóttu námskeiðið hafa þegar tekið að sér ritrýni. Greinilegur áhugi er meðal félagsráðgjafa á þjálfun bæði í ritun og ritrýni fræðigreina. Því er nú stefnt að því að endurtaka námskeiðin meðan eftirspurn er og lágmarksfjöldi er náð.

Mikil gróska er í útgáfu tímarita á fræðasviðum sem tengjast félagsráðgjöf, og er það fagnaðarefni. Nýtt íslenskt tímarit á sviði félagsvísinda, Íslenska þjóðfélagið, hóf göngu sína í ársbyrjun og norræna tímaritið Nordic Journal of Social Research er væntanlegt á næstunni. Fleiri tímarit skapa fagfólki aukna möguleika á að birta greinar sínar á viðeigandi vettvangi og eiga þar eitt-hvert val. Það skiptir máli að einskorða sig ekki við eigin tímarit. Opnun og virk samræða milli fag- og fræðihópa vikkar sýn og eykur gagnkvæma virðingu þeirra á milli. Það er líka áskorun að gefa út tímarit í jákvæðri samkeppni við aðrar útgáfur því það kallar á að skerpa yfirbragð sitt og snerpa kröfur. Því fleiri greinar sem berast Tímariti félagsráðgjafa, innan faghópsins sem utan, því meiri gróska og möguleikar að velja úr.

Í heftinu sem hér birtist hefur tekist að halda settu markmiði um fjölbreytni. Ritrýndu greinarnar eru þrjár. Greinar Annar G. Haugen og Guðrúnar Jónsdóttur fjalla báðar um barnavernd frá ólíkum sjónarhornum, efni sem snertir samfélagsumræðu og stöðu fagfólks. Sigurlaug Hauksdóttir birtir niðurstöður rannsóknar sinnar á alnæmi meðal unglingsstúlkna í Úganda og tengir þær störfum félagsráðgjafa á alþjóðavettvangi. Þá er grein Steindórs J. Erlingssonar vísindasagnfræðings snörp ádeila á lyfjaiðnaðinn, ávísanir lækna og ábyrgð annarra fagstétta á að gæta hagsmuna skjólstæðinga í því samhengi. Það er sérstakur fengur að þessari vel undirbyggðu og beittu grein og vonandi berst Tímariti félagsráðgjafa áfram slíkt efni frá öðrum fræðigreinum. Að þessu sinni eru tvær almennar fagfræðilegar greinar í heftinu. Í grein Gyðu Hjartardóttur segir frá starfsemi Sambands íslenskra sveitarfélaga og nýstofnuðu starfi félagsmálafulltrúa sem hún gegnir. Grein Guðnýjar Bjarkar Eydal og Lenu Hrannar Marteinsdóttur byggir á meistararitgerð Lenu um fjárhagsaðstoð og virkni. Auk hinna föstu liða um nýþekkingu, fréttir af sérsviðum o.fl. er spennandi umfjöllun Þrastar Haraldssonar blaðamanns um það sem er efst á baugi í samfélags- og fagumræðu um þessar mundir, þ.e. atvinnuleysi, virkni og velferð, og kallast þar umræðan á við grein Guðnýjar og Lenu.

Mér ljúft að þakka Þorvaldi Kristinssyni fyrir ánægjulegt samstarf og vandaðan yfirlestur á handritum og próförkum. Jafnframt er Félagsráðgjafafélaginu og öðrum sem lagt hafa hönd á plóg þokkuð góð samvinna um að gera þetta hefti sem best úr garði.

Sigrún Júlíusdóttir, ritstjóri